

ՍԱՄՍՈՐ

ՀԱՅԱՍՏԱՆԻ

ԱՆԴՐԱՆԻԿ ԴԵՍՊԱՆԸ ՊԱՐՍԿԱՍՏԱՆՈՒՄ

ԲՈԼՇԵՒԻԿԱՆ ԴԱԻՆԵՐ ԵՒ ԺՈՂՈՎՐԴԱԿԱՆ ՀԱՆԴԵՍՆԵՐ

1920 թվի սկիզբը Պարսկաստանում ընդհանուր համոզում էր տիրում, որ թիւրք - աղբրէջանեան դաւերը Նախընկալի շրջանում կը ճնշէին եւ շուտով կը վերականգնէին երկաթուղային հաղորդակցութիւնը, հետեւաբար եւ փոստ - հեռագրական ու առեւտրական յարաբերութիւնները Հայաստանի եւ Պարսկաստանի միջեւ: Արդու-թեանը զբաղած էր առեւտրական համաձայնութեան նախապատ-րաստութեամբ: Այդ նպատակով նա 1920 թ. մարտ 24-ին, դեսպա-նատանը առեւտրական գործին լաւատեղեակ անձնաւորութիւններէց մի խորհրդակցութիւն հրաւիրեց, որին մասնակցեցին մի շարք յայտնի վաճառականներ, ինչպէս Զիրբայէլ Բուդաղեանը, Ալեքսան խան Թունեանը: Այդտեղ մշակեցին այն հիմունքները, որոնցով խիտի սկսէին հայ - պարսկական առեւտրական յարաբերութիւն-ները:

Մինչ հայկական դեսպանը այսպէս խաղաղ աշխատանքի էր նը-ւիրում, անդին տեղի էին ունենում դէպքեր, որոնք հիմնովին պի-տի յեղաշրջէին դրութիւնը: Ապրիլ 28-ին բոլշեւիկները գրաւեցին Բապուն, եւ Աղբրէջանը յայտարարեց խորհրդային: Քիչ յետոյ, բոլշեւիկեան նաւերը երեւացին Էնզելիի առջեւ եւ սկսեցին ուժա-կոծել Ղազեան թաղամասը: Ժողովուրդը սարսափահար դիմեց փա-խուստի դէպի Ռնչտ: Անգլիական հրամանատարութիւնն ու պարսիկ կառավարութիւնը, յանկարծակիի եկած, զիմադրութիւն ցոյց չտը-ւին: Կենտրոնից ստացւած հրահանգի համաձայն Ռէշտի նահանգա-պետը, Էնզելիի անգլիական հրամանատարի ներկայացուցիչի հետ միասին, սպիտակ դրօշակ պարզած, նաւակով գնում են բոլշեւիկ-եան ուժերի հրամանատար Ուկաւչինի մօտ, որ յայտնում է, թէ իրենք ոչինչ չունեն անգլիացիները ու պարսիկները դէմ եւ միայն պահանջում են Դէնիկիւնեան նաւերը, ռազմաւթերը, զինւորական

ուժերն ու փախստականներին: Յայտնում է նոյնպէս, որ մի հեծե-
լազօրի ջոկատ ափ է իջել պարսից Աստարայում եւ մի հետեւակ
զօրամաս էլ շարժւում է դէպի Արտաբիլ: այս վերջին զօրամասը,
սակայն, յետ պիտի կանչւի:

Բանակցութեան հետեւանքով անգլիական զօրքերը քաջւում են
Ռէշտ, իսկ բոլշեւիկները համաձայնում են կնքել զինադադար,
բայց, հակառակ դրան, ափ են իջնում Էնգելիից հինգ կիլոմետր դէ-
պի արեւելք: Անգլիական հրամանատար Շամպան շտապում է ուժեր
ուղարկել նրանց դէմ: Ղազանի եւ Ռէշտի ճանապարհին մի թեթեւ
ընդհարում է տեղի ունենում, եւ անգլիացիները նորից քաջւում են
Ռէշտ: Բոլշեւիկները գրաւում են Էնգելին, ձեռք են դնում Դէնիկին-
եան նաւերի, ռազմածրերի ու փախստականների վրա եւ թուո-
ցիկներ ցրելով՝ սկսում են բոլշեւիկեան դադախարներ տարածել Ժո-
ղովրդի մէջ: Անգլիացիք ամրանալով Ռէշտում՝ բաւականանում են
միայն օդային հետախուզութիւններ կատարելով եւ գործօն քայլե-
րի չեն դիմում:

Բոլշեւիկները այս յարձակողական դիրքը ահագին յուզում եւ
իրարանցում առաջ բերեց Ժողովրդի մէջ, նոյն իսկ մայրաքաղա-
քում, այնպէս որ վարչապետ Վըսուդ - Դովլէն ստիպւած եղաւ մի
պաշտօնական հաղորդագրութեամբ հանդարտացնել հանրային խռո-
ված մտքերը եւ յայտնել, թէ կառավարութիւնը բանակցութեան
մէջ է, որ, յոյս ունի, կը պսակւի յաջողութեամբ: Եւ, յիշաւի,
շուտով բոլշեւիկների եւ պարսիկների միջեւ կնքեց համաձայնու-
թիւն, եւ բոլշեւիկները հեռացան՝ տանելով իրենց հետ գրաւած
աւարը:*)

Այս դէպքերը, բնականաբար, չէին կարող չյուզել հայկական
չրջանները: Յ. Արդութեանը օրը օրին տեղեկութիւններ էր ստա-
նում դէպքերի վայրից, Հ. Յ. Դ. մարմինների միջոցով եւ աշխա-
տում էր հասցնել Նրեւան: Հայկական չրջաններում մեծ իրարան-
ցում եւ վիշտ պատճառեց, մանաւանդ, մայիսեան ապստամբու-
թեան լուրը հայաստանում, բայց շուտով Նրեւանից ստացեց պաշ-

*) Աւելորդ չեմք համարում յիշել, որ դեռ Բագուի գրաւումից առաջ Թեհ-
րան եկաւ բոլշեւիկեան մի առաքելութիւն Յովսէփ Ղարախանեանի գլխավորու-
թեամբ: Քիչ յետոյ, Ղարախանեանը ձերբակալեց եւ ախարեց Բաղդադ: Ապա
Մոսկւայի կողմից եկաւ Ղազիմի ցարական հիւպատոս Բրաւինը, բայց ցարական
դեսպանը մերժեց նրան ճանաչել եւ տեղ տալ դեսպանատանը: Պարսիկ կառավա-
րութիւնը չմիջամտեց եւ Բրաւինը կարճ ժամանակ մնալով Թեհրանում՝ հեռացաւ:

տօնական հաւաստիացում, որ բոլշեւիկեան ապստամբութիւնը ճշն-
շրւած է եւ հանրապետական կառավարութեան դիրքը ամուր է:
Այս լուրը ընդունեց արտակարգ ցնծութեամբ: Այդ առթիւ, Մայիս
28-ին, Հայաստանի անկախութեան տարեդարձի օրը, տեղի ունե-
ցան եկեղեցական մաղթանք, համաժողովրդական հանդէսներ եւ
սլաշտօնական ընդունելութիւն դեսպանատանը: Վարչապետ Վրսուղ
- Դովլէն անձամբ եկաւ հայոց դեսպանատուն շնորհաւորելու Հա-
յաստանի աղատութիւնը: Այցելեցին նաեւ արտաքին գործոց նախա-
րարը իր օգնականի հետ, ներքին գործոց եւ այլ նախարարներ,
բարձրաստիճան սլաշտօնեաներ եւ օտար դիւանագիտական ներկա-
յացուցիչները իրենց գործակիցներով: Սա մի բացառիկ ուշադրու-
թեան ցոյց էր դէպի իր անկախութեան համար պայքարող Հայաս-
տանը, որոշ չափով նաեւ յարգանքի արտայայտութիւն Իշխանի ան-
ձի վերաբերմամբ. իր վայելուչ արտաքինով, քաղցր բնաւորու-
թեամբ եւ իմաստուն վարեւիակերպով Իշխանը վաստակել էր ամեն-
քի համակրանքը: Եթէ Հայաստանը մնար անկախ, նա պիտի դառ-
նար Թեհրանի դեսպանական կազմի աւագը (doyen):

Նոյն օրը ժողովրդական մեծ խրախճանքներ, կեր ու խում եւ
ուրախութիւն տեղի ունեցան եւ Հայկական Ակումբում, որ չքեղօ-
րէն զարդարւած էր ծաղիկներով, դորդերով եւ ազգային դրօշակ-
ներով: Եռագոյն դրօշակներով պծնւած էին եւ բոլոր հանդիսական-
ները, մեծ ու փոքր, որոնք մինչեւ լոյս ուրախացան: Քաղաքացի
ու դիւղացի խառնւած էին իրար: Զինուորական նւագախումբը, թա-
ռն ու քեամանչան, դաւուլ - զուռնան մրցում էին միմեանց հետ:
Երգերն ու ճառերը վերջ չունէին: Իշխանն ու իր չքախումբը անըս-
տառ աղբիւր էին ոգեւորութեան եւ բուռն ցոյցերի: Անկարելի է
առանց յուզումի վերլիչել այդ օրւայ ժողովրդական ցնծութիւնը:

Նման հանդէսներ եւ ուրախութիւններ տեղի ունեցան եւ հայա-
բնակ բոլոր վայրերում:

Պարսիկ կառավարութեան Հայաստանի եւ նրա ներկայացուցիչի
հանդէպ տաժած բարեկամական զգացմունքի մէկ արտայայտութիւն
էլ եղաւ Իշխանի համակրական ընդունելութիւնը Իրանի արքունա-
կան պալատում, ուր Շահի Եւրոպայից վերադառնալուն եւ թագա-
դրութեան տարեդարձի առթիւ հանդէս էր նշանակւած: Ներկայ
էին նախարարները, բարձրաստիճան սլաշտօնեաներն ու դիւանագի-
տական ներկայացուցիչները: Պալատի դրան առաջ Հայաստանի
դեսպանը ընդունեց բացառիկ պատիւներով. զինուորական նւագա-
խումբը նւագեց «Մեր Հայրենիք»-ը: Դիւանագիտական խնջոյքի
միջոցին, երբ բաժակ էր բարձրացւում Հայաստանի Հանրապետու-

Թեան ի պատիւ, նւագախումբը նորից նւագեց հայկական ազգային երգը: Շահինշահի պալատի կամարների տակ, պարսիկ արքունական նւագախմբի կողմից հայոց ազգային երգի նւագ, առաջին անգամը տասնեակ դարերից ի վեր — կարելի՞ էր չյուզւել ու չփառաւորւել:

XI

ԱՆԿԱՆՈՒԹԵԱՆ ՓՈՆԱՌՈՒԹԻՒՆ ԵՒ ՈՍԿՈՒ ՖՈՆԴ

1920 թ. ամառայ ամիսները Իշխանը անցկացրեց ամառանոցում: Մայրաքաղաք իջնելուց յետոյ նրա առաջին հոգսը Էդաւ կադմակերպել «փոխառութեան» եւ «Ոսկու Ֆոնդ»-ի գործը: Մի շարք խորհրդակցութիւնների մէջ ստեղծւեց կենտրոնական մարմին, որ պիտի ղեկավարէր ընդհանուր պարսկահայութեան փոխառութեան գործը: Կազմւեց նաեւ տիկիներէից եւ օրիորդներէից «Ոսկու Ֆոնդի» յանձնախումբ, Տիկ. Սաթ. Արզութեանի նախագահութեամբ, որ փոխառութիւնից անկախ ոսկի պիտի հաւաքէր Հայաստանի ոսկու պետական ֆոնդին նպաստելու համար: Նշանակւեց նաեւ պրօպագանդի յանձնախումբ, (դր. Յ. Ստեփանեան, Հ. Սազինեան, Ռ. Մովսէսեան, Գ. Իփէկեան, Յ. Թովմասեան, Ս. Յովհաննիսեան, Հ. Գարագաշ), որ դասախօսութիւններով, թուոցիկներով եւ ուրիշ համապատասխան միջոցներով պիտի ժողովրդականացնէր փոխառութեան եւ «Ոսկու Ֆոնդ»-ի դաշտիարը: Անկախութեան փոխառութեան կենտրոնական Մարմնի» Դիւանը կազմւեց հետեւեալ անձերից. նախագահ՝ Ալ. Խան Թունեան, փոխ-նախագահներ՝ Ռուբ. Թումանեան, Աւ. Տէր-Գրիգորեան, Գանձապահ՝ Գառն Էնչերեան, քարտուղարներ՝ Արս. Մարգարեան, Արամ Մովսէլ:

«Ոսկու Ֆոնդ»-ի հանգանակութիւնը Թեհրանում սկսւեց նոյ. 21-ին, հրապարակային մի հանգէսով: Խուռն բաղմութիւն էր լեցւած Հայ Ակումբի սրահը: Հանգէսի գրական — երաժշտական բաժնից յետոյ, բացւեց հանգանակութիւնը, որ վարում էր կանանց յանձնախումբը: Յանձնախումբի անգամուհիները շրջապատել էին մեծ սեղանը, որի վրա դրւած էին մի արկղ եւ մի քանի ժապաւինեալ եւ կնքւած մատեաններ: Նւիրատուները երկիւղածութեամբ մօտենում էին սեղանին ու նշանակում էին իրենց անունն ու նւիրաբերած ոսկէ իրը եղած բոլոր ծանօթութիւններով:

Պէտք էր տեսնել, թէ ինչ ոգեւորութիւն էր համակել բոլոր ներկաներին, ինչպիսի բարձր գիտակցութիւն եւ զոհողութեան աննրման ոգի երեւան բերեց հայ կինը: Հինգերորդ դարն էր, կարծես,

վերականգնացած: Հայ կիներ պոկում էր իր վրայից թանգազին իրերը եւ դնում հայրենիքի սուրբ սեղանի վրա: Երկու ժամայ մէջ սեղանի վրա կազմեց ամէն սեսակ ոսկեղէն զարդերի մի շքեղ բլուր: Այդ ամենը ամփոփեց արկղի մէջ եւ կնքեց: Հանդանակութիւնը շարունակեց դուրսն էլ երեք օր: Հանդանակութեան մասնակցեցին 400 հոգի:

Մի քանի օր յետոյ, նոյեմբեր 28-ին, աւելի մեծ հանդիսաւորութեամբ բացեց Անկախութեան փոխառութիւնը, որ հասարակութեան կողմից ընդունեց աննկարագրելի խանդավառութեամբ:

Հանդէսից առաջ եկեղեցում տեղի ունեցաւ Հանրապետական մարտնչ, որից յետոյ ճառեր խօսեցին Սէրհատեան քահանան, Հ. Մ. Արզար կաթողիկ երէցը եւ դր. Յ. Ստեփաննանը, որոնք երեքն էլ ծանրացան Հայաստանի տնտեսական վերածնութեան վրա եւ սրտառուջ հրաւէր կարգացին, մասնակցելու հանդանակութեան: Բուն հանդէսը տեղի ունեցաւ Հայ Ակումբում, որի զարդարած սլատերի վրա կախած էին մակադրութիւններ՝ «Մասնակցեցէ՛ք ներքին փոխառութեան», «Ոսկու Ֆոնդին», «Պահպանենք մեր անկախութիւնը», «Ամօթ դասալիքներին»: Իշխանի ոգեւորած ճառից յետոյ բացեց փոխառութիւնը որ անցաւ փայլուն յաջողութեամբ:

Թէ փոխառութեան ու «Ոսկու Ֆոնդ»-ի դործը կազմակերպելու եւ թէ, առհասարակ, դադութին այցելութիւն տալու նպատակով, 1920 թ. դեկտ. 4-ին, Իշխանը պ. Աւ. Տէր-Գրիգորեանի հետ դուրս եկաւ շրջելու հայաբնակ քաղաքները եւ նոյն օրը երեկոյեան հասաւ Ղազին, ուր յաջորդ օրը նշանակած էր փոխառութեան եւ «Ոսկու Ֆոնդ»-ի հանդանակութեան բացման հանդէսը: Հայաստանում կատարւած փոփոխութիւնների մասին արդէն լուր ունէր եւ խիստ տխուր էր, բայց հաւատում էր, թէ այդ ժամանակաւոր վիճակ է եւ շուտով անկախութիւնը կը վերականգնուի:

Փոխառութեան եւ «Ոսկու Ֆոնդ»-ի դործը Ղազինում էլ անցաւ մեծ յաջողութեամբ: Տեղի ունեցան սրտաշարժ տեսարաններ: Անմոռանալի է, մանաւանդ, Սալմաստի դադթական պառաւ Դիւբարի պատկերը: Մօտենալով Իշխանին՝ նա ասաց. «Պարուն Երւանդ դատ չի մնացիր, թալնւանք. կօ. մնացիր է էս նշանիս մատնիքը. պախիր էմ էր մինուճար տղիս խարսի խմար. էն էլ Աստուած շատ տըսաւ. փա՛ռք ուրը, դադթի ճամբախին սպանւաւ. զինուոր էր. մկա էս հանդէսը իմ լաճի խարնիսն է, էս էլ կօ էս մատնիքը տաս էմ: Աստուած դուժմանի ումրը քակի, տունը աւրի, հայի սուրը կտրուկ անի»: Ու դողդոջուն ձեռքով մատից հանելով մատանին՝ դրեց սեղանի վրա: Բոլորի աչքերը լեցւած էին արցունքներով...:

Ղազարինից Իշխանը անցաւ Համադան: Նոյն ողբերգութիւնը եւ այստեղ: Իշխանին մեծ աջակցութիւն ցոյց տւեց յայտնի վաճառական Հայկազ Գուլումճեանը, որ իր ընտանիքի իւրաքանչիւր անդամի անունով ստորագրեց 10,000 թուման փոխառութեան եւ 1000 թուման էլ դրեց Իշխանի անձնական տրամադրութեան տակ:

Համադանից Իշխանը ստիպւած եղաւ վերադառնալ Թեհրան:*) Հայաստանի մասին աւելի եւ աւելի մտահոգիչ լուրեր էին հասնում: Հաղորդում էին մեծ մասամբ Ատրպատականի առաջնորդ Ներսէս սրբազանը եւ Մուշեղ Տէր Զաքարեանը: Այս վերջինը պարսից արտաքին գործոց նախարարութեան 20 հոկտեմբեր պաշտօնագրով ճանաչած էր Հայաստանի Հանրապետութեան Թաւրիզի հիւպատոսական գործակալ: Սեւրի դաշնագրի ստորագրութեան լուրը առնելուց յետոյ, Իշխանը յաջորդաբար առաջարկեց ինձ, աղա Կենտրոնական դպրոցի տեսուչ Կար. Պիօնեանին՝ ստանձնել Թաւրիզի հիւպատոսի պաշտօնը: Մեր մերժումիւ վրա, պ. Զիրբ. Բուդաղեանի հետ համախորհուրդ նոյն առաջարկութիւնը արաւ պ. Մ. Տէր Զաքարեանին, որ Թաւրիզում ծանօթ անձնաւորութիւն էր, գիտէր եւրոպական լեզուներ եւ յարաբերութեան մէջ էր հիւպատոսական շրջանների հետ: Պ. Զ. Բուդաղեանի պնդումով նա ընդունեց իրեն յանձնւած պաշտօնը, բայց տեղեկութիւններ հաղորդելուց զատ ուրիշ որեւէ գործ չկատարեց:

Թեհրանում Իշխանը կացութիւնը գտաւ բոլորովին փոխւած: Մի կողմից նրան սպասում էր խորհրդային կոմիսար Ասք. Մուսեանի հեռագիրը իրեն եւ պարսիկ արտ. գործոց նախարարութեան, որով յայտնւում էր Իշխանի պաշտօնանկութիւնը եւ կարգադրւում էր դեսպանատան թղթերն ու գույքերը յանձնել ոռւսական ներկայացուցչութեան. այս հրահանգը Իշխանը թողեց անհետեւանք: Միւս կողմից, Թաւրիզի գործակալի միջոցով, եկել էր հետեւեալ ծածկագիր հեռագիրը. «Թեհրան, Հայաստանի դիւանագիտական ներկայացուցիչ Իշխան Արդութեանին. Պետական ծախսերը կրճատելու նպատակով նախարարների խորհուրդը որոշեց վերացնել մի շարք արտասահմանեան միսիաներ, որոնց չարքում նոյնպէս Թեհրանինը. խնդրում եմ միտին հաշւեյարդարի ենթարկել եւ ամբողջ կազմով վերադառնալ Նրեւան յանձնելով գործերը համապատասխան անձնաւորութեան տեղացիներից իբրեւ պատուաւոր ներկայացուցչի, պայ-

*) Կառավարութեան հրահանգով Պարսկաստանում գործը լրացնելուց յետոյ, Իշխանը պիտի անցնէր եւ Իրաք ու Հնդկաստան փոխառութեան եւ «Ոսկու Ֆոնդ»ի հանգանակութեան համար:

մանով որ պետական դանձարանից օժանդակութիւն չստանայ: № 6747, նոյեմբեր 27. Արտաքին գործոց նախարար Ս. Վրացեան»։*)

Այս կարգադրութիւնը արւած էր Հայաստանի խորհրդայնացումից առաջ. խորհրդայնացումը հիմնովին փոխում էր կացութիւնը: Իշխանը որոշեց մնալ իր պաշտօնում եւ շարունակել դիւանագիտական գործունէութիւնը, ինչպէս արին եւ միւս ներկայացուցիչներն ու փարիզի պատուիրակութիւնը:

Նա անհետեւանք թողեց եւ դեկտեմբերի վերջերը Երեւանից ըստացւած Հայաստանի Յեղկոմի նախագահ Ս. Կասեանի հետեւեալ հեռագրական հրահանգը. «Յեղափոխական Կոմիտէի որոշման համաձայն դաշնակցական կառավարութեան կողմից նշանակւած բոլոր ներկայացուցիչները կորցնում են իրենց լիազօրութիւնը եւ գործերը պէտք յանձնեն նոր ներկայացուցիչների»։ Այս հեռագրից յետոյ Հ. Հ. դեսպանութիւնը իր դիրքը ձեւակերպեց հետեւեալ որոշումով. «ձեռնարկ մնալ ստեղծւած դրութեան հանդէպ եւ սպասել դէպքերի զարգացման, ընդունելով, որ սովետական ըեժիմի մուտքը Հայաստանում արդիւնք է ստեղծւած տնտեսական եւ քաղաքական նոր պայմանների: Մինչեւ այդ, սկսւած փոխառութեան եւ ոսկու Փոնդի գործը շարունակել նախկին եռանդով եւ աշխատել վերջացնել մինչեւ փետրւարի վերջը. մինչև այդ՝ գրութիւնը կը պարզւի եւ կորուչի մեր դիրքը»:

Այս որոշումը, 1921 թ. յունւ. 4-ին, Իշխանը ծածկագիր հեռագրով հաղորդեց Թաւրիզի գործակալ Մուշ. Տէր Զաքարեանին՝ պատուիրելով նախկին ձեռով շարունակել աշխատանքները:

Այս որոշման հետեւանքով, Իշխանը վերսկսեց իր ընդհատւած ճանապարհորդութիւնը եւ մեկնեց դէպի Նոր-Ջուղա, ուր հասաւ չաբաթ օր, յունւ. 14-ին:

Նոր-Ջուղան տօնական կերպարանք էր ստել: Վաղ առաւօտից

*) Այս որոշումը կառավարութիւնը տւել էր ոչ միայն մի շարք ներկայացուցչութիւնների, այլեւ փարիզի պատուիրակութեան համար: Պատճառը նախ դրամական էր. քէ պատուիրակութիւնները եւ քէ ներկայացուցչութիւնները իրենց շաւլ ծախսերով շատ ծանր էին նստում Հայաստանի վտիտ գանձարանի վրա: Բայց կար եւ քաղաքական պատճառ՝ լուրջ դժգոհութիւններ փարիզի պատուիրակութեան եւ որոշ ներկայացուցիչների գործունէութեան դէմ: Ենթադրուում էր կառավարութեան հակակշիռը աւելի ուժեղացնել եւ ամփիշակամ դարձնել: Պատուիրակութեան վերաբերմամբ կար եւ այն պարագան, որ Սեւրի դաշնագրի ստորագրութեամբ, նա իր պաշտօնը լրացրել էր եւ պէտք է փոխարինուէր դեսպանով: Նախորդ կառավարութիւնը նրան արդէն կանչել էր Երեւան: ԽՄԲ.

սկսած ժողովուրդը եւ ու դեռի մէջ էր: Աղգային մարմիններ, ա-
կանաւոր անձինք կառքերով եւ ինքնաշարժերով շտապում էին դէ-
պի վերին կայարանը: Ամբողջ ճանապարհը բռնւած էր հոծ բազմու-
թեամբ: Նահանգապետը ներկայացուցիչի հետ ուղարկել էր իր շը-
քեղ փակ կառքը 50 ձիաւորներով, ինչպէս նաեւ մի քանի «եղաք-
ներ»:*) Սպահանից Զուլա տանող ամբողջ ճանապարհի վրա կանդ-
նեցւած էին պահակ ոստիկաններ՝ հսկելու համար կարդապահու-
թեան վրա:

Ժամը 2-ին հասաւ Իշխանը եւ ընդունեց խանդավառ ցոյցերով:
Մի ժամ Բաղադա ալգում հիւրասիրելուց եւ հանդուստնալուց յե-
տոյ, նա, շրջապատւած կառավարական ներկայացուցիչներով ու
պահակախումբով, աղգային մարմիններով ու ողեւորւած բազմու-
թեամբ, շարժւեց դէպի Սբ. Ամենափրկիչ վանքը, որ շքեղ զար-
դարւած էր պարսկական եւ հայկական զրօշակներով, դորդերով ու
կանաչով: Վանքի դրան վրա խոշոր տառերով գրւած էր. «Բարի
գալուստ անդրանիկ ներկայացուցիչին»:

Երբ թափորը մօտեցաւ վանքին, զանգերը սկսան մեղմօրէն հըն-
չել: Թեմակալ առաջնորդ Սահակ Եպ. Այվատեանը, հեղեւորակա-
նութեան գլուխն անցած, հանդիսաւոր ընդունելութիւն ցոյց տւեց
Հայաստանի դեսպանին: Երկու բարձրաստիճան անձնաւորութիւն-
ներ կողք կողքի, շրջապատւած անհաշիւ բազմութեամբ, բուռն ծա-
փերի եւ «կեցցէ»-ների փարափի տակ, անցան վանքի բակը, ուր
կարգով շարւած էին աղգային դպրոցի սանուհիներն ու հայ արինե-
րը եւ օդը թնդացնում էին աղգային երգով –

Մեր Հայրենիք, ազաւո, անկախ...

Երգ ու «կեցցէ»-ներ, զանգերի ղողանջ, բորբոքւած բազմու-
թեան խանդավառ ծափեր ու բացականչութիւններ... Անմոռանալի
վայրկեաններ:

Դեսպանը առաջնորդէր տաճարը, ուր տեղի ունեցաւ հանդի-
սաւոր մաղթանք «Վասն Հանրապետութեան Հայաստանի»: Մաղ-
թանքից յետոյ, վանքի նախագաւթում Իշխանը մի քանի խօսքով
չնորհակալութիւն յայտնեց կառավարութեան եւ հայ հասարակու-
թեան, խրախուսանքի խօսք ուղղեց արիներին եւ «ուռա»-ներով ու
«կեցցէ»-ներով առաջնորդէր Առաջնորդարանի ընդարձակ դահլիճը,
ուր թեմի կողմից առաջնորդ Սահակ Եպ. Այվատեանը, իսկ Նոր-
Զուլայի հասարակութեան կողմից Յար. Յորդանանեանը բարի գա-

*) Զարդարւած չիեր:



ԻՆՆԱՆԻ ԺԱՄԱՆՈՒՄԸ ՆՈՐ ԶՈՒՂԱՆ. ԱՄՆՆԱՓՐԻՆԶ ՎԱՆՔՈՒՄ

լուստի խօսք ուղղեցին Հայաստանի անդրանիկ ղեսպանին: Իշխանը պատասխանեց զղացած մի ճառով, որով ջատագովեց՝ Հայաստանի Հանրապետութիւնը եւ նրա ծնունդ տւող հերոսներին:

Նոր-Ջուղայում Իշխանը մնաց 17 օր: Այդ ամբողջ ժամանակը անցաւ այցելութիւններով ու փոխայցելութիւններով, հանդէսներով ի պատիւ ղեսպանի կամ փոխառութեան ե«Ոսկու Տոնդ»-ի հանգանակութեան համար: Նոր-Ջուղայի բնակչութեան համար տօնական օրեր էին դրանք, որոնց յիշատակը երբեք չի ջնջւի նրանց մտքից:

Յունւար 17-ին (հին տոմարով 4-ին) տեղի ունեցաւ Ամանօրի հանդէսը, որ յետաձգւած էր ի պատիւ Հայաստանի ներկայացուցչի: Երկու փառահեղ դէմքեր՝ Առաջնորդն ու Իշխանը գրաւել էին պատւաւոր աթոռներ: Հասարակութիւնը ասլրեց անմահ յուզումի ու ոգեւորութեան ժամեր:

Յունւ. 21-ին, Աղլային Կենտրոնական Դպրոցի ընդարձակ սրահում ի պատիւ Հայաստանի ղեսպանի տեղի ունեցաւ գրական երեկոյթ ուր եւ բացւեց Անկախութեան Փոխառութիւնը: Ջուղայի հասարակութեան մէջ առաջ էր եկել մի մտայնութիւն, թէ քանի որ Հայաստանը դարձել է խորհրդային, փոխառութիւնն այլեւս աւելորդ է: Իր ճառում զլխաւորապէս այդ մտայնութեան վրա ծանրացաւ Իշխանը եւ համոզեցուցիչ փաստերով ցոյց տւեց փոխառութիւնը շարունակելու անհրաժեշտութիւնը:

Նոյն մտայնութեան դէմ բռնուն կերպով արտայայտեց եւ պ. Արամ Երեմեանը, որ հայ ժողովրդի երկաթէ կամքի եւ հայ քաջարի բանակի զովքը անելով՝ յորդոր կարդաց ոյժ տալ փոխառութեան, որ աւելի հաստատուն հիմքերի վրա պիտի դնէ մեր պետութիւնը: Խօսքը ուղղելով Հայաստանի անկախութեան սպառնացող ուժերին՝ բողբոջեցին ու թուրքերին, նա բացականչեց. «Այսօր օրն է մեր հերոսութեան, մեր պատմութեան. այսօր է, որ ցոյց պէտք է տանք մեր նամարդ դահիճներին մեր բազուկները, մեր երկաթէ կամքը, մեր մուրճերն ու հարւածները»:*)

Երեք քառորդ ժամ տեւող ընդմիջոցումի ժամանակ բացւեց փոխառութեան արձանագրութիւնը, որ տւեց 5000 դոլար**) Ապա հանդէսը շարունակեցաւ նոյն թափով: Երգ, արտասանութիւն, ճառ: Վերջին խօսքը ասաց առաջնորդ Սահակ Եպ. Ալվատեանը:

*) «Այգ», 1921 թ. № 5, ուր գետնդւած է հանդէսի մկարագրութիւնը եւ սղագրւած հառերը:

**) Փոխառութիւնը շարունակեց եւ դուրսը:

Յունւ. 23-ին, ցերեկը, ի պատիւ Իշխանի հայ արեւնների մարդական հանդէս տեղի ունեցաւ Կենտրոնական Դպրոցում: Իսկ երեկոյեան, Առաջնորդարանում Նոր-Ջուղայի հայութեան կողմից տրուեց հանդիսաւոր հացկերոյթ, 90 հոգու մասնակցութեամբ եւ Յար. Յորդանանեանի սեղանապետութեամբ:

Ի պատիւ Իշխանի թէյասեղան տրուեց ազգային երկսեռ դպրոցների մանկավարժական խորհրդի, ինչպէս եւ Հայուհեաց Բարեգործական Ընկերութեան կողմից:

Յունւ. 28-ին Կարմիր Սաչի Միութիւնը ի պատիւ Իշխանի ներկայացրեց «Անոյշ» օպերան:

Իշխանը ամբողջ ժամանակ շրջապատուած էր ընդհանուր սիրով ու գուրգուրանքով: Ջուղայի հայութիւնը մեծ ջերմութեամբ ընդունեց ու պահեց իր մէջ Հայաստանի դեսպանին. նոյնպիսի խանդավառութեամբ ու ցոյցերով էլ ճանապարհ դրեց: Իշխանը մեկնեց՝ խոստանալով յաջորդ տարի օգոստոսին վերադառնալ եւ Այվատեան Արքեպ. -ի հետ մեկնել Հնդկաստան նոյն առաքելութեամբ:

XII

ԴԵՍՊԱՆՈՒԹԵԱՆ ՎԵՐՋԸ.

Թեհրանում Իշխանին յուսահատական լուրեր էին սպասում: Հայաստանից մռայլ տեղեկութիւններ էին հասնում — բոլշեւիկեան վարչազուլթիւններ, բանտարկութիւն ու զնդակահարութիւն, սով եւ յարաճուն զժողովրդի մէջ: Պարսկահայութիւնը ենթարկւած բարոյալքման պիտոր ջրի մէջ ձուկ որսալու սովոր տարբեր սկսել էին գլուխ բարձրացնել. մինչեւ այդ դեղին դոյնով ծածկւածները կարմրում էին: Անկաշուն էր կացութիւնը եւ Պարսկաստանի կեանքում. իրար յաջորդող կառավարութիւնները չէին կարողանում հաւասարակշռել պետութեան ներքին եւ արտաքին վիճակը:

Թեհրանում Իշխանը գտաւ ընդհանուր յուսալքում. փոխառութիւնը եւ «Ոսկու Փոնդ»-ի հանդանակութիւնը կանգ էին առել. կառավարութեան հետ սկսւած բանակցութիւնները ընդհատուել էին. այլեւս խօսք չէր կարող լինել փոստ — հեռագրական կամ առեւտրի դաշնագրի մասին: Դադարել էր եւ Թաւրիզի գործակալութեան՝ պ. Մ. Տէր-Ջաքարեանի գործունէութիւնը: Նրա բնակարանի վրա տնկւած երկար փայտի վրա երբեք չծածանեց հայկական եռագոյնը: Ինքն էլ վախի մէջ էր, թէ շուտով ստիպւած պիտի լինի միւս հիւպատոսների հետ հեռանալ Թաւրիզից, որ գտնուում էր բոլշեւիկների



ԻՇԽԱՆԸ ՀԱՅ ԱՐԻՆՆԵՐԻ ՄԷՋ, ԶՈՒՂԱՅՈՒՄ

սպառնալիքի տակ: Ատրպատականի առաջնորդարանն էր միայն, ներսէս Արքեպ․ Մելիք Թանդեանը, որ լուռ ու մտախոհ, բայց անհրկուն կամքով, շարունակում էր իր պատասխանատու աշխատանքը եւ օրը օրին տեղեկացնում Իշխանին ստացւող նորութիւնների մասին:

Մի օր էլ լուր հասաւ, թէ Հայաստանի ժողովուրդը ապստամբել է, թէ խորհրդային իշխանութիւնը տապալւած է, թէ Երեւանում նորից վերահաստատւած է ազգային իշխանութիւնը:

Զարմանալի գուզադիպութեամբ, ճիշտ նոյն միջոցին պատմական մեծ յեղաշրջում տեղի ունեցաւ եւ Պարսկաստանում․ փետր․ 22-ին, մի հզօր կամքի տէր զնդապետի վերջնադրով – որ յետոյ պիտի դառնար Պարսկաստանի վերանորոգիչ – Շահ Կաջարին արտակարգ լիազօրութիւններ տալով վարչապետ Նշանակեց Սէյիդ Զիւաէդդին Թաբաթա Բային, և այդ օրւանից Իրանը բռնեց վերածնութեան ճանապարհը:

Վարչապետ Սէյիդ Զիւաէդդին, փոխայցելութեան գալով Հայաստանի դեսպան Իշխանին, ջերմ խնդակցութիւն արտայայտեց Հայաստանի ազատութեան առթիւ եւ պատրաստակամութիւն յայտնեց աջակցելու հայ ժողովրդին բոլշեւիկների դէմ մղած պայքարում:

Հայաստանի դեսպանութեան եւ պարսիկ կառավարութեան միջեւ վերականգնեցին պաշտօնական յարաբերութիւնները: Պարսիկ կառավարութիւնը ամէն կերպ ընդ առաջ էր դնում Իշխանի դիմումներին եւ միշտ համակրական վերաբերում ցոյց տալիս Հայաստանին ու հայ ժողովուրդին:

Հայաստանից ստացւող լուրերը, սակայն, երկար ժամանակ անորոշ էին: Միակ աղբիւրը՝ եւրոպական հեռագրական գործակալ լութիւններն ու պարսիկ կառավարութիւնը այնքան էլ չատ բան չգիտէին Հայաստանի ներքին վիճակի մասին: Կացութիւնը վերջնականապէս պարզեց միայն մարտ 13-ին, երբ ստացեց Հայաստանի նոր կառավարութեան նախագահ Ս․ Վրացեանի ընդարձակ հեռագիրը Զեչերինին եւ «բոլորին, բոլորին, բոլորին»: Այդ հեռագիրը ցրեց բոլոր կասկածներն ու տատանումները եւ վճռակա՛նապէս հաստատեց, որ Հայաստանը նորից անկախ է:

Նորից բարձրացաւ պարսկահայ ժողովրդի տրամադրութիւնը: Խանդավառութիւնը մեծ էր ամէն տեղ: Հայ ժողովուրդը, կարծես, նոր կեանք, նոր հոգի ստացաւ: Թէ պատմական ինչ խոշոր դէպք էր Հայաստանի փետրւարեան ապստամբութիւնը, կարելի է դատել

ներա գործած հզօր տպաւորութիւնից պարսկահայ ժողովրդի տրամադրութեան վրա :

Աւա՛ղ, սակայն, նոր ազատութիւնը երկար չտեւեց : Երբ ես Ղազարիի գաղթականութեան հետ, ամբողջ 28 օր ճանապարհորդելուց յետոյ, մայիս 21-ին հասայ Թաւրիզ, կաթածահարի պէս, մեծ վշտով ու դառնութեամբ գտայ այնտեղ Հայաստանից եկած տարագիրներին՝ նախարարներ, խորհրդարանի անդամներ, պաշտօնեաներ, ղինւորներ : Պարզ էր՝ հայ ժողովուրդը չէր կարողացել դիմանալ տրտաքին թշնամի ուժերի դրոհին եւ տեղի էր աւել... Նրա վերջապահ մասերը դեռ պայքարում էին Լեռնահայաստանում, բայց սրանց պարտութիւնն էլ օրերի խնդիր էր...

Քիչ յետոյ, յունիսին, եկաւ նոր Հայաստանի հիւպատոս «ընկեր Երզնկեանը» : Անշուք եւ անսխառնակ կերպով մտաւ Թաւրիզ, բաց տրաւ «հիւպատոսարանը» եւ Հայաստանի Հանրապետութեան հիւպատոսական գործակալ Մուշեղ Տէր-Չաքարեանից ստացաւ միայն մերկ մնացած դրօշակի փայտը, որի վրա պարզեց բոլշեւիկեան դրօշը :

Իսկ Թեհրանում, դեռ բաւական չերկար ազգային դրօշը ծածանւում էր Հայաստանի դեսպանատան դիմին : Իշխանը յուսահատ չէր : Ռուսաստանի ներքին խռովութիւնները մի կողմից, Կովկասում տեղի ունեցող շարժումները, արտաքին աշխարհի թշնամական վերաբերումը բոլշեւիկներին, յոյն — տաճիկական պատերազմը, դէպքերը Զանգեզուրում — այդ բոլորը նրա աչքին յուսատու երեւոյթներ էին : Նա հաւատում էր, թէ Հայաստանը նորից կը վերագրաւելի եւ Հայկական Անկախութիւնը նորից կը վերականգնի : Այդպէս էր համոզւած պարսկահայ ժողովուրդը, որ սրտատրոփ լուրերի էր սպասում :

Իշխանի աշխատանքներն այդ օրերին կենտրոնացած էին գլխաւորապէս գաղթականների խնդրի վրա՝ Բասրայից սկսած մինչեւ Ատրպատական : Հոծ գաղթականութիւնը՝ զրկւած անգլիական նպաստից՝ անեղանելի կացութեան մէջ էր : Ամէն կողմից օգնութեան սրբատակեղք ազադակներ էին հասնում : Իշխանը անվերջ բախում էր անգլիացիների, Ամերիկեան նպաստամատոյցի դռները, ինչպէս եւ հեռագրում էր Փարիզ, Պատւիրակութեան : Այդ դիմումները աւին որոշ արդիւնք, եւ գաղթականութեան վիճակը մասամբ մեղմացաւ :

1921 թ. ամառը, ըստ սովորութեան, դէսպանատունը փոխադրւեց ամառանոց, ուր Հայաստանի դրօշը շարունակում էր ծածանել դեսպանատան վրա : Երբ աշնանը Իշխանը վերադարձաւ մայ-

րաքաղաք. այլևս Սէյիդ-Ջիադէդինին յաջորդել էր նոր վարչապետ Ղաւամ - Սալթանէն: Պարսիկ կառավարութիւնը շատ քաղաքավարի կերպով հասկացրեց, թէ դրօշակ պարգեւն այլևս անյարմար է, քանի որ Հայաստանը, դժբախտաբար, կորցրել է իր անկախութիւնը: Մի սարսափելի հարւած, որ Իշխանին խոցեց մինչեւ հոգու խորը: Այդ օրը սուգի օր էր նրա համար: Եւ ոչ միայն նրա. ամբողջ պարսկահայութիւնը ողբում էր հայրենի անկախութեան կորուստը:

Այնուհետեւ համակ ցաւ ու տառապանք եղաւ Իշխանի կեանքը: 1922 թ. Թեհրան եկաւ խորհրդային Հայաստանի «դիւանագիտական ներկայացուցիչ» Լեւոն Սարգսեանը, որ հէնց առաջին օրից կրճոտ թշնամական դիրք բռնեց Իշխանի հանդէպ: Իշխանը անտեսեց նրա պահանջները եւ ոչինչ չյանձնեց դեսպանատան գործերից: Սարգսեանը դիմեց պարսիկ արտաքին գործերի նախարարութեան եւ սրա միջնորդութեամբ մի քանի անկարեւոր թղթեր ստացաւ Իշխանից:

Իշխանը շտապեց հաշւեյարդարի, ենթարկել դեսպանութեան գործերը. «Ոսկու Ֆոնդ»-ի եւ փոխառութեան գումարների մի մասը վերադարձեց ստանալ ուղղող տէրերին, իսկ մնացածը ուղարկւեց Հայաստան՝ սովեալներին սնունդ եւ դիւղացիներին լծկան բաժանելու համար: Հնարաւոր վախճանին հասցրեց նաեւ դադլթականներին օգնութեան գործը: Ապա ընտանիքով մեկնեցաւ Եւրոպա:

Մեր սրբազան Հայրենիքի անկախութիւնը, Հանրապետութեան կառավարութիւնը, Հայաստանի անդրանիկ դեսպանը Պարսկաստանում մի - մի փայլող, շողջողուն աստղ էին հայ ժողովրդի դարերով տառապած կեանքի մոռյլ երկնակամարի վրա: Այդ աստղերը երեւացին, բոցալառեցին ու կարճատեւ փայլից յետոյ նորից անհետացան: Մենք համոզւած ենք, սակայն, որ նրանք նորից պիտի երեւան աւելի տեւական եւ պայծառ լոյսով լուսաւորելու համար մեր հայրենի երկնակամարը: Ներկայ տողերը աղօտ արձագանգն են այն փայլուն ու խանդավառ, աւա՛ղ, այսօր այլևս երազ դարձած օրերի, որով մի պահ ապրեց ու ոգեւորւեց պարսկահայ ժողովուրդը:

Թաւրիզ.

(Վերջ)

